



POSLOVNIK O RADU SKUPŠTINE DŽEMATA GISLAVED #nacrt#

Na osnovu Statuta Islamske zajednice Bošnjaka u Švedskoj, član 37, Skupština džemata Gislaved donosi vlastiti Poslovnik o radu kako slijedi:

Član 1

Skupština treba biti legalno sazvana. Njeno sazivanje treba da se obavi na način kako je to propisano Statutom džemata i Islamske zajednice Bošnjaka u Švedskoj, a u skladu sa općom demokratskom praksom.

Član 2

Zvanična informacija sa pozivom treba da doprije do članova džemata (u daljem tekstu: zastupnika) najkasnije 14 dana prije održavanja skupštine.

Poziv za Skupštinu treba da sadržava jasno određen datum, vrijeme i mjesto održavanja.

Član 3

Za Skupštinu aktualni džematski odbor treba pripremiti pismene izvještaje o radu u proteklom periodu, eventualne prijedloge o izmjenama Statuta i/ili drugih normativa, kao i prijedlog plana rada, budžeta i slično.

Član 4

Utvrđivanje kvoruma se obavlja na samom početku. Pristigli zastupnici će se registrirati (prebrojati) i na taj način će se javno konstatirati da je skupštinsko tijelo formirano. Prilikom konstatacije će se uvesti u zapisnik ukupan broj skupštinskih zastupnika sa pravom glasa, te utvrditi 1/3, 2/3 i 1/2 prisutnih zastupnika.

Na početku sjednice Skupštine na prijedlog Izborne komisije biće izabran predsjedavajući Skupštine.

Član 5

Skupštinu vodi predsjedavajući Skupštine uz pomoć Radnog predsjedništva koje se sastoji od aktuelnog predsjednika džematskog odbora, zapisničara i dva ovjerivača zapisnika koji ujedno i broje glasove.

Predsjedavajući, zapisničar i dva ovjerivača zapisnika se biraju na početku svake skupštine.

Član 6

U zapisnik se unose samo usvojeni zaključci i odluke. Ovjerivači zapisnika imaju zadatak da pregledaju, te po potrebi izvrše ispravke i dopune zapisnika, te sa svojim potpisom ovjere vjerodostojnost zapisnika.



Član 7

Ovjereni zapisnik postaje zvaničan dokument džemata nakon što ga potpišu ovjerivači zapisnika i predsjedavajući Skupštine.

Član 8

Konstatiranje uslova za održavanje skupštine vrši predsjedavajući, a na osnovu Statuta džemata i Statuta Islamske zajednice Bošnjaka u Švedskoj.

Član 9

Utvrđivanje dnevnog reda. Predsjednik je dužan da pročita prijedlog dnevnog reda, eventualno ponudi određena pojašnjenja ili ponudi predlagaču (aktualni džematski odbor) da pojašni nešto u dnevnom redu ako za tim postoji potreba, a zatim da otvori raspravu povodom predloženog dnevnog reda. Prilikom rasprave predsjednik neće dopuštati rasprave o određenim pitanjima koja se nalaze u prijedlogu dnevnog reda, već samo o tome da li se određena tačka treba nalaziti na dnevnom redu Skupštine ili ne. Ukoliko postoje prijedlozi za izmjene i dopune predloženog dnevnog reda, onda će prvo biti stavljeni na glasanje pojedini prijedlozi za izmjene i dopune predloženog dnevnog reda. Predsjednik zvanično konstatira koji prijedlozi su usvojeni, a koji ne, i time konstatira dnevni red rada Skupštine.

Član 10

Prilikom diskusije svaki zastupnik u sklopu jedne tačke dnevnog reda ima pravo na jednu diskusiju od 3 minute i jednu repliku od 2 minute.

Član 11

Predsjedavajući vodi računa o kvorumu prisutnih prilikom donošenja odluka.

Odlučivanje glasanjem može biti glasanje o odluci jednostavnog karaktera ili glasanje o odluci složenog karaktera.

Član 12

Glasanje o odluci jednostavnog karaktera se koristi onda kada se Skupština treba izjasniti o određenom prijedlogu koji je jednostavnog "da ili ne" karaktera. Predsjedavajući će staviti prijedlog na glasanje:

Ko je za ponuđeni prijedlog?

Ko je protiv?

Ko je suzdržan?

Da bi prijedlog bio usvojen potrebno je da prilikom glasanja dobije „običnu/prostu većinu“, odnosno najmanje 50% + jedan glas "za" od ukupnog broja prisutnih zastupnika.

Član 13

Glasanje o odluci složenog karaktera je glasanje koje se primjenjuje u situaciji kada postoji dva ili više različitih prijedloga po nekom pitanju o kojem Skupština treba donijeti odluku. Prilikom takvog glasanja, predsjedavajući će ovako staviti prijedloge na glasanje:



1. Ko je za prvi prijedlog?
2. Ko je za drugi prijedlog? itd...

Nakon prebrojavanja glasova biće utvrđeno koji prijedlog je dobio najviše glasova. Broj potrebnih glasova da neki prijedlog bude usvojen ovakvim načinom glasanja nije određen procentualnom formom, već je uslovljen jedino time da treba dobiti "relativnu većinu", odnosno barem jedan glas više od bilo kojeg drugog prijedloga. Prilikom ove vrste glasanja predsjedavajući neće tražiti od Skupštine da se izjašnjava protiv prijedloga, niti će tražiti da se Skupština izjasni koliko glasača je bilo suzdržano. Ukoliko prijedlozi dobiju isti broj glasova i zbog toga bude nemoguće donijeti odluku, predsjedavajući će ponovo otvoriti raspravu po istom pitanju. U toku rasprave je moguće da se postigne konsenzus, da neki predlagač odustane od svog prijedloga ili da glasačko tijelo promijeni svoje stajalište. Ako je potrebno, nakon rasprave će prijedlozi opet biti stavljeni na glasanje kako bi se donijela potrebna odluka.

Član 14

Izborna komisija svoj rad temelji na važećim Izbornim pravilima Islamske zajednice Bošnjaka u Švedskoj i/ili Islamske zajednice u Bosni i Hercegovini, te predlaže kandidate za sve funkcije. Skupština se prvo izjašnjava o prijedlozima Izborne komisije. Ukoliko neki prijedlog Izborne komisije ne dobije potrebnu prostu većinu pristupa se slobodnom predlaganju i izboru poštujući važeća Izborna pravila Islamske zajednice Bošnjaka u Švedskoj i/ili Islamske zajednice u Bosni i Hercegovini.

Član 15

Zastupnici u skupštini džemata prilikom svog izostanka i/ili napuštanja Skupštine nemaju pravo imenovati svog zamjenika za učešće na Skupštini ili kovertirati svoj glas po određenom pitanju.

Skupštinski zastupnici nemaju pravo napuštati zasjedanje Skupštine bez odobrenja predsjedavajućeg Skupštine. Predsjedavajući će, uz pomoć zapisničara, evidentirati zastupnike koji su napustili rad Skupštine i izvršiti potrebne korekcije u skupštinskom kvorumu.

Član 16

Pravo diskusije na Skupštini imaju samo skupštinski zastupnici džemata Gislaved i članovi organa Islamske zajednice Bošnjaka u Švedskoj.

Član 17

Ovaj Poslovnik o radu Skupštine džemata Gislaved je usvojen na Skupštini džemata, xx. xx. 2020. godine.

Predsjedavajući Skupštine:

Gislaved, xx-xx 2020.